



Inatsisartut

*Aningaasaqarnermut Ataatsimiititaliaq
Finansudvalget*

Ulloq/Dato: 30. marts 2010

J.nr.: 01.31.06/10-00465

Aningaasaqarnermut Naalakkersuisoq

Aningaasaqarnermut Ataatsimiititaliap suliaq nr. 01.31.06/10-00465 pillugu ataasinngornermi ulloq 29. marts 2010 aalajangiineranik Naalakkersuisunut ilisimatitsineq.

Namminersorlutik Oqartussat qitiusumik allaffeqarfiisa illutaat pillugit oqaasertaliussat.

Naalakkersuisut inassutigaa,

- oqaasertaliussat ilanngunneqartut konto pingaarnermut 20.30.10-mut oqaaseqaatitaallit, Namminersorlutik Oqartussat qitiusumik allaffeqarfii, nr. 3, ilassutissatut aningaasaliinissamut inatsimmi 2010-mi ilanngunneqarnissaat,
- oqaasertaliussat ilanngunneqartut konto pingaarnermut 20.30.10-mut oqaaseqaatitaallit, Namminersorlutik Oqartussat qitiusumik allaffeqarfii, nr. 4, ilassutissatut aningaasaliinissamut inatsimmi 2010-mi ilanngunneqarnissaat,
- oqaasertaliussat taakkunungalu oqaaseqaatit taamaaqataat peqatigitillugit aningaasanut inatsimmit 2010-mit peerneqassasut

Aningaasaqarnermut Ataatsimiititaliap oqaaseqaatai

Kotomut pingaarnermut 20.30.10-mut, Namminersorlutik Oqartussat qitiusumik allaffeqarfiannut tunngasumut, oqaasertaliussat marluk allangortinneqarnissaasa akuerineqarnissaat Naalakkersuisut suliami matumani qinnutigaa. Oqaasertaliussat taakku 2010-mi aningaasanut inatsimmi atuuttut taarserpaat imatullu oqaasertaqarlutik:

"Konto pingaarnermut 20.30.10-mut Namminersorlutik Oqartussat qitiusumik allaffeqarfii

Nr. 3.

Naalakkersuisut piginnaatinneqassapput ukiumi aningaasaliiviusumi matumani Inatsisartut Aningaasaqarnermut Ataatsimiititaliaat akuersissuteqartereerlugu Namminersorlutik Oqartussat Nuummi allaffeqarfissaannik nutaamik pissarsinissaq pillugu Illuutileqatigiiffimmik Illuut A/S-mik isumaqatigiissuteqarnissamut. Illuut pissarsiarineqassaaq aktianillu piginneqatigiiffimmit pigineqassalluni Naalakkersuisunilli ingerlanneqassalluni.

Nr. 4.

Naalakkersuisut piginnaatinneqassapput Illuut A/S-imit attartornissamut ukiuni 20-ini taamaatinneqarsinnaanngitsumik isumaqatigiissuteqarnissamut, allaffeqarfiup illutaanik attartornissamut, Nuuk Center-ip qaavani allaffeqarfittut napasuliatut sananeqartussamik. Ukiut 20-it qaangiunnerini, attartornermut isumaqatigiissut

ukiunik 10-inik siumoortumik nalunaaruteqarluni ingerlaavartumik atorunnaarsinneqarsinnaavoq. Inatsisartut Aningaasaqarnermut Ataatsimiititaliaat, Attaveqaqatigiinnermut Ineqarnermullu Ataatsimiititaliaq kiisalu Kukkunersiunerumut Ataatsimiititaliaq sanaartornermut naatsorsuutini soorluttaaqq isumaqatigiissutaasimasuni tamakkiisumik ilisimatinneqarsimapput.”

Tamanna ataatsimiititaliap arlalinnik oqaaseqaateqarnissaanik pisariaqalersitsivoq.

Oqaasertaliussanut taakkununga marlunnut nassuiaatit (siuliani issuarneqartumut ilaatinneqanngitsut) ataatsimiititaliap isumaa malillugu ersarinngillat. Oqaasertaliussami nr. 3-mut nassuiaammi suliassaq minnerpaamik 3.000 kvadratmeterimik angissusilik taaneqarpoq nr. 4-mullu nassuiaammi suliassaq 7.168 kvadratmetererpianik angissusilik taaneqarluni. Oqaasertaliussanut taakkununga marlunnut nassuiaatini oqaasertat imminnut naapertuussarnerusimasariaqartut ataatsimiititaliap isumaqarpoq. Taamaalilluni ersarissumik paasinanngilaq oqaasertaliussani taakkunani marlunni suliassaq ataaseq imaluunniit assigiinngitsut marluk innersuussutigineqarnersut. Oqaasertaliussani taaneqartunut nassuiaatini erseqqissarneqarnissaanut tapersiininini ataatsimiititaliap aalajangiineq una aqcutigalugu oqaatigaa.

Allaffissuup nutaap Namminersorlutik Oqartussat allaffiattut atorneqarneratigut ukiumoortumik sipaarutissat 700.000 kr.-inut annertussusilerneqarsinnaasorinarput. Tamanna maanna attartukkanut arlalinnut, atorunnaartussatut naatsorsuutigineqartunut (B-1573, B-2171, B-2325 aammalu B-2289), attartornermut ukiumoortumik akiliutip 10,5 mio. kr.-iusup aammalu allaffissuup atorneranut Illuut A/S-imut ukiumoortumik 9,8 mio. kr.-inik akiliuteqartarnissap nikingassutaattut naatsorsorlugu. Illuummut attartornermut akiliutit illup silataatungaata aserfallatsaalineqarneranut (amma) matussusiissasut ataatsimiititaliap naatsorsuutigaa, taamaanngippammi Illuut aqcutigalugu sanaartornikkut attartornikkullu sipaarutaasut annikippallaalinngikkunik sipaarutaanngitsuissinnaammata.

Allaffissuarmi kantiinaliornissaq ilanngullugu missingersuusiorneqanngilaq. Tamanna isumaliutigeqqinneqartariaqarpoq. Ilaatigummi Namminersorlutik Oqartussat maanna kantiinarisaat mikivallaarlunilu ullutsinnut naleqqukkunnaarluinnarsimavoq ilaatigullu igaffimmik kantiinamillu pilersitsinissaq siunertaralugu allaffissuarmi nutaami kingusinnerusukkt allannortiterinissaq akisoorujussuussasoq naatsorsuutigineqartariaqarpoq.

Allaffissuarmit nutaamit Namminersorlutik Oqartussat illutaannut sulluliornissaq eqqartorneqarsimavoq. Sulluliassaq taanna suliassamut ilanngullugu missingersuusiorneqarsimanersoq ersarinngilaq.

Oqaasertaliussamut nr. 3-mut nassuiaatit naapertorlugit suliassaq illoqarfimmi pilersaarummut kommunitumullu pilersaarummut ilassummut suli ilanngunneqarsimannngilaq. Tamanna naapertuutinngitsutut isigineqarpoq. Piffissap imaalinerani tamanna Naalackersuisunit iluarsereerneqarsimasuuppat ataatsimiititaliamit pitsaasutut isigineqassagalarpoq.

Tamatuma kingorna ataatsimiititaliap suliami matumani amerlanerussuteqartunut ikinnerussuteqartunullu avippoq.

Ataatsimiititaliami ikinnerussuteqartut, Per Berthelsen amma Finn Karlsen isumaqarput piffissami pisortat sipaaruteqarfigisaanni nunattalu karsiata killilinnik aningaasaateqarnerani allaffissuarmik nutaamik sananissamut pisortat aningaasaataannik atuinissaq

pissusissamisuunngitsoq. Sanaartornissamut aningaasat ingerlatseqatigiiffik Namminersorlutik Oqartussanit tamakkiisumik pigineqartoq aqputigalugu taarsigassarsinikkut imaluunniit nunatta karsia toqqaannartumik aqputigalugu pissarsiarineqarpata Namminersorlutik Oqartussat taarsigassarsisuunerat taamaalillutillu annaasaqaratarsinnaanerit allanngortinneqarsinnaangilaq. Tamatuma saniatigut suliassami tamarmi aningaasatigut sipaarutissat ukiumoortumik 700.000 kr.-iinnassapput, tamannalu Namminersorlutik Oqartussat annaaratarsinnaasaannut sanilliullugu annikippallaarluni.

Ataatsimiititaliami amerlanerussuteqartut, Naaja Nathanielsen, Olga P. Berthelsen aamma Niels Thomsen isumaqarput suliassaq pitsaasumik aningaasaliinerusoq, tassa Namminersorlutik Oqartussat ullumikkumut sanilliullugu aki appasinnerusoq atorlugu annertunerusumik pitsaaneruseqarpat inissaqalissammata. Tamanna sulisut sulinerminni pitsaaneruseqarpat avatangiiseqalernissaannut periarfissiissaaq, sanaartormullu taarsigassarsiat akilerneqareerpata Namminersorlutik Oqartussat illup ingerlanneqarneranut taamaallaat aningaasartuuteqalissallutik. Kiisalu Hotel Grønlandip ilinniartunut inissianngortinneqarnissaanut sanaartorneq periarfissiissaaq, tamannalu Nuummi ilinniartunut inissaaleqinerujussuaq eqqarsaatigalugu assorsuaq pilerinartutut isigineqarpoq.

Amerlanerussuteqartut kissaataat naapertorlugu aalajangiisoqarpoq.

Aningaasaqarnermut Ataatsimiititaliap aalajangiinera

Siuliani allassimasutut paasinnillutik Naalakkersuisut inassuteqaataat Aningaasaqarnermut Ataatsimiititaliami amerlanerussuteqartut **akueraat**. Aalajangikkap matuma tiguneranit sapaatip akunnerisa pingasut ingerlanerini oqaaseqaatinut siuliani allassimasunut Naalakkersuisut oqaatigiumasaasa (tassunga ilanngullugit oqaasertaliussanut nassuiaatit iluarsisat) kalaallisut danskisullu tiginissaat ataatsimiititaliap naatsorsuutigaa.

Aningaasaqarnermut Ataatsimiititaliaq sinnerlugu

Naaja Nathanielsen
Aningaasaqarnermut Ataatsimiititaliami siulittaasoq